

Suliffeqarnermi innersuussisarneq il.il. pillugit inatsisartut peqqussutissaattut siunnersuummut nassuiaatit

Nassuiaatit nalinginnaasut

Suliffeqarnermi innersuussisarneq il.il. pillugit Inatsisartut peqqussutissaattut siunnersuut taanna suliffeqarnermik iluarsaaqqinnerup 1998-imi sisamaqiusanik iluarsaaqqinneq pilersaarutitalerlugu aallartinneqartup ilagaa tassaasunik suliffeqarnermik naliliisarluni misissuinerit kisitsisitigullu paasissutissat, suliffeqarnerup ilusiligaanera aqqissuussaanageralu, inatsisinik iluarsaaqqinneq kiisalu sulisartunik piginnaanngorsaaneq.

Suliffeqarnermi naalakkersuinikkut ingerlatsinermut angunagaasut pingaarnerit ilagaa sulisartut ilaannik suliffeqarnermi pissarsiarineqarsinnaasunik piginnaanngorsaaneq. Anguniagaavoq sulisartunik piginnaanilinnik pisariaqartitat pigineqalernissaat sulisartunillu nunanit allaneersunik pisariaqartitsinerup annikillisinneqarnissaa. Taamatuttaaq anguniagaavoq suliffeqanngitsut ilinniartitaanerata suliffeqalernissaasaluunniit qulakkeerneqarnissaat inooqataanerminni nuttarsinnaalernissaat siunertaralugu.

Suliffeqarnermik iluarsaaqqinnermut anguniagaasoq pingaarutilik alla tassa kommunini ilitsersuisarfinnik suliffeqalernissamullu piareersarfinnik pilersitsineq. Taakkunuunatigut ilinniagaqarnermut piginnaanngorsaanerullu naammassinnaannut tunngavissat pitsaanerulersinneqarput. Inunnut ataasiakkaanut suliassanut pilersarusiornikkut inunnut ataasiakkaanut anguniagaasut naammassineqarnissaat qulakkeerneqassapput. Taamaaliornikkut siunissami sulisartut assersuutigalugu inuusuttut atorfissaaruttarnerat annikillisinneqassaaq.

Pingaarutilittut anguniagaavoq suliffeqarnermik iluarsaaqqinneq naleqquttumik annertussusilimmik inatsitigut piviusunngortinneqassasoq. Suliffissarsiuussisarneq pillugu Inatsisartut peqqussutaat atuuttoq 1988-imeersuuvoq, inatsisillu ullutsinnut naleqqussarneqarnissaa, paasiuminarnerulersinneqarnissaa peqqussummillu atuisunut pissarsiariuminarnerulersinneqarnissaa pisariaqartinneqarput. Taamatuttaaq siunnersuummi kingunerisaasunik iluarsiiisuteqartoqarpoq assersuutigalugu kommunini aqutsinermut inatsisip 1994-imeersup kingunerisaanik, taamaalimmat kommunalbestyrelsit suliffeqarnermut ataatsimiititaliamik pilersitsinissaminnut pisussaaffeerullutik.

Inatsisartut peqqussutissaattut siunnersuutikkut tassuuna siunertarineqarpoq najukkani assigiinngitsuni suliffeqarnermut suliniutit anguniakkanut tamakkunani najugaqartut kommunalbestyrelse aqqutigalugu angorusutaannut tunngatillugu qanoq ineriartortinneqassanersut ungasinnerusorlu eqqarsaatigalugu najukkani assigiinngitsuni nunalu tamakkerlugu suliffissanik innersuussisarneq

piginnaangorsaanermillu sulinerit pisariillisaavigineqarnissaannut pingaarnerusutigut killiliussassanik aalajangersaasoqarnissaa.

Aalajangersakkamik nutaamik ilanngussisoqarpoq Naalackersuisut nuna tamakkerlugu IT atorlugu suliffissanik nalunaarsuiffimmik pilersitsisinnaasut. Siunertaavoq suliffeqarnermi innersuussisarnerup eqaannerulernissaa atuisunullu atoruminarnerulernissaa ataasiakkaanut annertunerusumik sullissisoqarsinnaangortillugu. Suliffeqanngitsuttaaq ilinniarfinnut, ilinniarnissamut periarfissanut, suliffissanik neqeroorutinut il.il. ilisimannilersinnaapput.

Tusarniaanermut akissutit:

Ukuninggaanniit tusarniaanermut akissutit tiguneqarput:

Attaveqaqatigiinnermut Ineqarnermullu Pisorta qarfik, Naatsorsueqqissaartarfik, Aalisarnermut, Piniarnermut Nunalerinermullu Pisorta qarfik, Nunami Namminermi Pissutsinut Allaffik, KANUKOKA, AK, Kalaallit Nunaanni Sulisitsisut Peqatigiiffiat, Peqqissutsimut Pisorta qarfik, Ilaqutariinnermut Pisorta qarfik, Akileraartarnermi Pisorta qarfik, PIP, Allatto qarfik, Aqutsinermut Pisorta qarfik aamma Aningaasaqarnermut Pisorta qarfik.

Ilaqutariinnermut Pisorta qarfik, PIP, AK; Akileraartarnermi Pisorta qarfik, Nunami Namminermi Pissutsinut Allaffik, Sulisoqarnermut Aqutsisoqarfik, Aalisarnermut, Piniarnermut Nunalerinermullu Pisorta qarfik siunnersuummut oqaaseqaatissaqarsimanngillat.

Attaveqaqatigiinnermut Ineqarnermullu Pisorta qarfimmit oqaatigineqarpoq siunnersuut siunertarissaartoq kisiannili aningaasaqarnikkut kingunerisaasussat naammattumik erseqqarissuunngitsut. Pisorta qarfittaaq naliliivoq inunntu ataasiakkaanut suliaassanik pilersaarutit atorneqalernissaat allaffissornikkut oqimaatsuussasut.

SIK kissaateqarpoq peqqussummi atuuttumi § 1, imm. 3 ikkuteqqinneqassasoq, tamannalu Naalackersuisut akueralugu malippaat. Kommunalbestyrelsip suliffeqarnermut atyaatsimiititaliamik pilersitsisinnissamik pisussaaffiisa aalajangiusimaneqarnissaannik SIK-p kissaatigisaa Naalackersuisut malinngilaat. SIK-p ajuusaarnartuutippaa kattuffiit suliffissarsiuussisarfinnik pilersitsisinnaanerannut misiliilluni aaqquussisoqarsinnaaneramik aalajangersagaarunnera, tikkuarluguli pingaarnarpaajummat suliffissamik innersuussisarnerup pitsaanerpaamik ingerlanissaa. Tamakku saniatigut SIK-p paaserusuppaa sooq nalunaarut nr. 5, 3. september 1982-imeersoq atorunnaarsinniarneqalernersoq. Naalackersuisut § 16, imm. 2 innersuussutigaat tassani allassimammat nalunaarut taanna ingerlaannassasoq allangortinneqarnissami atuukkunnaarsinneqarnissamiluunniit tungaanut.

SIK isumaqarpoq sulilernissamut piareersartarfinnik ilitsersuisarfinnillu pilersitsineq ilorraanut aallariarnerusoq.

Naatsorsueqqissaartarfik Naatsorsueqqissaartarfiup paasissutissanik katersisarnermut tunngatillugu piginnaatitaaffiisa naleqqussarneqarnissaat pillugu nalinginnaasunik oqaaseqarpoq aamma Pisortaqarfiup suliffissanik nalunaarsuiffimmik pilersitsinissaa pillugu siunnerfinnik aamma paasissutissanik nalunaarsuisarnermuttaaq tunngasunik.

Naatsorsueqqissaartarfik sulilernissamut piareersartarfiit ilitsersuisarfiillu suliassaannut tunngatillugu aalajangersimasunik apeqquteqarpoq. Naalakkersuisut oqaatigissavaat siunnersuummut nassuiaatini tamakkununga tunngasut ilanngullugit eqqaamaneqarsimmata. Naatsorsueqqissaartarfiuttaaq oqaatigaa aningaasaqarnikkut kingunerisaasussat nalilersorlugit erseqqinnerusumik misissorneqartariaqartut. Naalakkersuisut nassuiaatini makkunani aningaasaqarnikkut kinguerisaasussat pillugit immikkoortoq innersuussutigissavaat.

KANUKOKA-p siunnersuut kommunitut tusarniaassutigisimavaa, kommunit qulit akissuteqarsimallutik. KANUKOKA isumaqarpoq peqqussutissaq akuersissutigineqassappat pisariaqartoq peqqussummut atatillugu kommunalbestyrelsi suliassai pillugit erseqqissunik malittarisassaqaqarnissaq, aningaasartassaanik aningaasaliisoqartariaqarluni, misilittaalluni sulinermut aamma suliffissaqartitsiniutinut malittarisassaqaqartariaqarluni. Naalakkersuisut innersuussutigissavaat malittarisassanik erseqqinnerusunik suliaqartoqarnissaanut siunniunneqartut pillugit aalajangersagaqarmat. § 3, imm. 3-mi aalajangersagaq Tunngaviummik Inatsimmut naapertuuttunngortinneqarpoq. KANUKOKA-p suliffissarsiortunut atugassarititaasunik paasinnittarneq pillugu malittarisassat ujjartorpai. Naalakkersuisut oqaatigissinnaavaat sulineq taanna ingerlammat ilaatigut KANUKOKA suleqatigalugu.

Ataatsimut isigalugu KANUKOKA isumaqarpoq peqqussut kommunit aningaasartuuteqarnerulernerannik kinguneqassasoq. Aningaasaqarnikkut kingunerisaasussat pillugit Naalakkersuisut peqqussutissamut nassuiaatini makkunani tamanna pillugu immikkoortoq annertusisaq innersuussutigissavaat.

Kalaallit Nunaanni Sulisitsisut Peqatigiiffiat assigiinngitsunik oqaaseqaateqarsimavoq teknikimut tunnganerusunik suliarineranut ilanngunneqartunik. Tamakku saniatigut Sulisitsisut Peqatigiiffiata kommunit suliassaannut piumasaqaatit minnerpaaffissaasa sukumiinerusumik allaaserineqarnissaat takorusussimagaluarpa. Naalakkersuisut innersuussutigissavaat peqqussutissatut siunnersuut killissarititaasunik inatsisaammat.

Peqqissutsimut Pisortaqarfik siunnersuutip imaanut oqaaseqaatissaqarsimanngilaq kisiannili ilitsersuisarfiit sulilernissamullu piginnaanngorsarfiit aningaasalersorneqarnissaat pigisallu nuunneqarnerannut aningaasartuutit apeqquserlugit erseqqissarlugulu Pisortaqarfik aningaasalersueqataasinnaanngilluinnarmat.

Aningaasaqarnermut Pisortaqarfik taamatuttaaq Inuiaqatigiit Aaqqissugaanerannut Allaffik siunnersuummut arlalinnik oqaaseqaateqarsimapput immikkoortunut pingaarnernut pingasunut eqikkarneqarsinnaasunik:

- 1) Aningaasaqarnermut Pisortaqarfiup siunnersuutip toqqaannartumik malitsigisaasunillu aningaasaqarnikkut sunniutissaasa allaaserineqarnerat maqaasivaa
- 2) Aningaasaqarnermut Pisortaqarfiup maluginiarpaa siunnersuummi suliffeqarneq pillugu naalakkersuinikkut ingerlatsineq pissusiviusutigut nunamut siammarniarneqarmat. Aningaasaqarnermut Pisortaqarfiup tamatumunnga tunngatillugu erseqqinnerusumik allaaserineqaqquaa tamanna qanoq suliffeqarnerup ataatsimoortinneqarnissaanik kissaateqarnermut naapertuuttuunersoq
- 3) Aningaasaqarnermut Pisortaqarfiup suliffeqarnermi naalakkersuinikkut ingerlatsinermi imarisaanut tunngatillugu siunnersuummi pingaarnertut nutaartaasut nassaariuminaatsippai isumaqarlunilu nutaartaasut Inatsisartut peqqussutaanni atuuttumi inissaqarluarsinnaasut.

Taakkununnga tunngatillugu Naalakkersuisut matumani aningaasaqarnikkut kingunerisaasussat pillugit immikkoortoq aamma suliffeqarnermi iluarsaaqqinnerup ingerlanerani inatsisinik ingerlaavartumik naleqqussaanssamik Suliffeqarnermi iluarsaaqqinnermi siunniussaasut innersuussutigissavaat.

Allattoqarfik inatsimmik teknikikkut misissuisimavoq taamaalereermallu allangortitsinerit ilanngunneqarlutik.

Aningaasatigut kingunerisassai

Inatsisartut peqqussutaat taanna malillugu kommunalbestyrelsip suliassaasa allaffissornikkut aqunneqarnissaannut qitiusumik ilitsersuisarfinnik suliffeqalernissamullu piareersarfinnik kommunalbestyrelsip pilersitsisinnaaneranik maleruagassat malitsigisaannik aamma Naalakkersuisut tamakkuninnga ilaatigut tapiissuteqartarnek ingerlatsinerlu pillugit maleruagassanik aalajangersaasinnaammata siunnersuut Nunatta Karsianut aningaasatigut kinguneqarsinnaavoq. Siunertaavoq § 5-ip kingunerisaanik suliassanngortussat aningaasalersorneqarnerat inuusuttut kiffartuussinerata najukkanilu inuussutissarsiornermut ilinniarfiit aningaasalersorneqarnerisa iluarsaateqqinneqarnerannut atatillugu qulakkeerneqassasoq. Suliarineqartartut qulaani taaneqartut aningaasalersorneqarnerannik iluarsaaqqittoqassaaq kommunit suleqatigalugit. Taamaaliornikkut kommunit aamma Namminersorerullutik Oqartussat akornanni suliassat/nammagassat aveqatigiissutigineqartarneranni allangortoqassagaluarpat tamanna KANUKOKA-p aamma Naalakkersuisut isumaqatigiinniutigisariaqassavaat.

Siunnersuummi § 7-imi aalajangersagaq, taanna malillugu innersuussivigineqartoq angallassinermut pigisallu nuunneqarnerannut aningaasartuuteqartussaassanani, aningaasaqarnermut tunngasutigut kinguneqartariaqassaaq.

Aningaasalersuisoqarsinnaavoq aningaasaateqarfimmik imaluunniit aningaasanik agguaassassanik pilersitsisoqarneratigut qulakkeerniarlugu sulisartut pisariaqartitsiviunerpaanut nuussinnaanissaat suliffissarsiortumut suliffeqarfimmulluunniit sulisussarsiortumut artukkersuutaanngitsumik.

Suliffissanik nalunaarsuiffimmik pilersitsisoqassappat ingerlatsisoqassallunilu tamanna Nunatta Karsianut aningaasatigut kinguneqassaaq maannakkut suliffeqarnermik iluarsaaqqinnermut aningaasaliissutitigut aningaasanut inatsimmi aningaasaliivigineqartartunik. Najukkani IT-teknologimik pisariaqartinneqartumik pilersitsineq kiisalu sulisussanik ilinniartitsineq kommuninut aningaasatigut kinguneqaratarsinnaavoq.

Allaffissornikkut kingunerisassai

Siunnersuut piffissami aallarnisarfiusumi qitiusumik allaffissornikkut aqutsisoqarfimmi allaffissornerulernermik kinguneqassaaq suliffissanik nalunaarsuiffissap pilersinneqassaguni pilersinneqarnerata kingunerisaanik, kisiannili kommunini allaffissornikinnerulersoqartussaassagunarluni tassami suliffissanik nalunaarsuiffimmik atuineq sukkanerusumik eqaannerusumillu suliffeqarnermi innersuussisarnermik kinguneqartussatut naatsorsuutigineqarmat.

Suliffeqarnermi suliniutaasut pillugit ukiumoortumik nalunaaruteqartarnissamik siunnersuummi aalajangersagaq allaffissornikkut kinguneqarsinnaavoq tamanna qitiusumik allaffissornikkut aqutsisoqarfimmi ulluinnarni allaffissornermi naatsorsuutigineqassanngippat kisiannili suliffeqarnermut tunngassuteqartuni sammisaqarluni suliniuteqarnermi allaffissorneq siunissami annikillisinneqarsinnaassaaq suliniuteqarfissat erseqqinnerulernerisigut.

Inunnut ataasiakkaanut iliuusissatut pilersaarusiortalernissamik , § 5 takuuk, aalajangersagaq kommuninut allaffissornikkut kinguneqarsinnaavoq, tassami aallarnisarnerup nalaani suliaassat taamaattut suliarineqartarnissaannut inunnik sulisussanik amerlanerusumik sulilersitsisoqartariaqassagunarmat.

Aalajangersakkanut ataasiakkaanut nassuiaatit

§ 1-imut

Tamatigut pingaarnerpaatillugu kommunit taamaallaat najukkani kommunit sulissaat suliarisassavaat, taamatuttaaq suliffeqarnermi innersuussisarneq. Kommunit kommunit suliaassat pillugit nunap immikkoortuini suleqatigiilersinnaapput. Nuna

tamakkerlugu suliassat Naalackersuisunit suliarineqartassapput, tassunga atatillugu taaneqarsinnaavoq nuna tamakkerlugu IT atorlugu suliffissanik nalunaarsuiffissaq pilersinneqassagunartoq, takuuk § 10.

Peqqussutikkut tassuuna kommunit inuussutissarsiutigalugu suliffeqarfinni inatsisitigut allatigut malittarisassaqaqtitaasuni aningaasaliinikkut inuussutissarsiutinik ineriartortitsineranut peqataanissaannut periarfissaat killilerneqanngillat.

§ 2-mut

Aalajangersakkakut aalajangersarneqarpoq kommunit suleqataallutik suliffeqarnermut tunngasutigut ingerlatsinerminnut ilanngullugu suut suliassarineraat. Kommunit najukkani suliffeqarnermi ineriartornerup malinnaaviginissaanut akisussaapput.

§ 3-mut

Aalaajngersagaq Inatsisartut peqqussutaanni atuuttumi § 5, imm. 1-imut, 3-mut aamma 4-mut naapertuuppoq, ilinniartitaanermut inuussutissarsiutinullu ilitsersuisarneq ilanngutiinnarlugit.

Inuussutissarsiutinut tunngaviusumik ilinniartitaanerit iluarsaateqqinneqarnerannut atatillugu, tassani ilaatigut siunniunneqarluni qinnuteqaateqartut STI-mut pisoqqamut naleqqiullugu inuussutissarsiutinut tunngaviusumik ilinniartitaanermik aallartitsinissaminnut annertunerusunik periarfissaqarnissaat naatsorsuutigineqarpoq ilinniartitaanermik inuussutissarsiutinullu piareersarnernik pilersitsisoqassasoq qinnuteqaateqartunik inuussutissarsiutinut tunngaviusumik ilinniartitaanermik aallartinnissaminnut naammattunik periarfissalinnik piginnaangortitsisinnaasunik.

Qulakkeerneqassaaq najukkani qitiusumik ilitsersuisarfiit suliffeqalernissamullu piareersarfiit pilersinneqarnissaat taamaalilluni innuttaasut toqqaannartumik sullinneqarsinnaassammata. Taamaaliortoqassaaq inuit ataasiakkaat periarfissaat aallaavigalugit inuussutissarsiortut pisariaqaqtitaannut sanilliussisarluni.

Kommunit nunap immikkoortuani suliffeqarnermi naalackersuinikkut ingerlatsinermi suliniutit nukittorsarneqarnissaat suleqatigiissutigissallugu. Tassanissaaq periarfissaq eqqarsaatigineqarpoq kommunit suliffissaaleqinerup akiorneqarnera, suliffeqalernissamut piareersarfiit piginnaangorsarfiillu sulissutigineqarneri nunap immikkoortuani suleqatigiinnikkut suleqatigiissutigisinnaagaat.

§ 3 imm. 2 takuuk nalunaarutiginnittoqartassaaq kommunalbestyrelsip Inuussutissarsiordermut Pisortaqarfinni suliffeqarnermut immikkoortortaqaarfimmut

suliffissaaleqineq pillugu kisitsisitigut paasissutissanik immersuiffissat atorlugit nassiussaqaerneratigut, Naatsorsueqqissaartarfiup paasissutissat tamakku Kalaallit Nunaanni Naatsorsueqqissaartarfik pillugu Inatsisartut inatsisaat atuuttoq malillugu atortarsinnaavai.

§ 4-mut

Aalajangersakkakut qulakkeerneqassaaq najukkani kommunip pisortat namminersortullu suliffeqarfiisa akornanni suleqatigiittoqalernissaa.

§ 4, imm. 2 kiisalu kommunini suliffissaqartitsiniutinut tapiissuteqartarneq pillugu nalunaarut atuuttoq malillugit aningaasanut inatsimmi suliffissaaleqinermik akiuineq il.il. pillugit kommuninut aningaasanik tapiissutissanik immikkoortitsisoqarsimavoq.

§ 5-imut

Aalajangersakkap aalajangersakkami atuuttumi § 9 assigiinnangajappaa. Aalajangersagaq kommunimi Inuussutissarsiutinut ilinniartitaanernullu ilitsersuiffeqarnissaanik qulakkeerisoq ilanngunneqarpoq. Suliniutit taakku kommunit pisortaqaarfiit KIIP aamma Inuussutissarsiornermut Pisortaqaarfik suleqatigalugit pitsanngorsarniarlugit sulissutigaaat, assersuutigalugu ilitsersuisartutut ilinniartitaanermik pilersitsineq aqutigalugu.

Nutaatut siunnersuutigineqarpoq suliffissaaleqisut, inuusuttut suliffissaqalernissamut suliniutini peqataasut kiisalu allat pisinnaasaqaernerulernissamut suliniutini peqataasut peqatigalugit kommunit ataasiakkaanut iliuusissatut pilersaarusiussasut.

Aammattaaq taamaaliornikkut qulakkeerniarneqarpoq manna tikillugu inuusuttut sullivii suliffeqalernissamut suliniutinik taarserneqassasut, taamaalilluni inuusuttut sulianut aalajangersimasunut tunngatillugu taamatullu atuagarsornikkut pisinnaasaqaernerulernissaat qulakkeerneqassammat. Siunertarineqarpoq inuusuttut piginnaasaqaernerulersitsisumik ilinniartitaanernut tiguneqarnissaminnut piareersarneqarnissaat imaluunniit ataavartumik suliffeqalernissaminnut periarfissinniarneqarnissaat.

Naalackersuisut inuusuttut kiffartuussisarnerat pillugu Namminersornerullutik Oqartussat nalunaarutaat nr. 35, 29. december 1995-imeersup atuukkunnaarsinniarlugi siunertaraat ilinniartitaanernut suliffeqalernissamullu piareersartarneq pillugu nalunaarummik taarsissamaarlugu, siunertaralugu suliffeqanngitsut sulimut tunngatillugu, atuagarsornermut, inuttut inuuniarnermilu piginnaanngorsarneqarnissaat, taamaalillutik ilinniartitaanernut piginnaaneqalerfiusunut isernissaminnut imaluunniit ataavartumik suliffeqalernissaminnut piareersarneqartarsinnaaqullugit.

Ilinniartitaanermut suliffeqalernissamullu piareersarneq inunnut ataasiakkaanut iliuusissatut pilersaarutininik tunngaveqartinneqassaaq, kommunimi qitiusumik ilitsersuisarfimmi suliffeqanngitsup aamma pisortap/ilitsersuisartup akornanni isumaqatigiissutigineqartartussanik.

Inunnut ataasiakkaanut iliuusissatut pilersaarummi suliffeqanngitsup siunissami suliffeqarnissaminik/inuunissaminik kissaatigisai aallaavigineqartassapput, ilitsersuisartup suliassaasa pingaarnersarissallugu suliffeqanngitsup kissaatigisaasa katiterneqarnissaat imaalillugu siunissami imminut pilersorsinnaangussalluni.

Naalackersuisut isumaqarput inunnut ataasiakkaanut iliuusissatut pilersaarut suliffeqanngitsup kissaatigisaanik aallaavilik suliffeqanngitsumut annertunerpaamik piomassuseqalersitsisinnaasoq taamaalillunilu anguniakkat iliuusissatut pilersaarutit imaasa angunissaannut annertunerpaamik periarfissiisinaalluni.

Tassunga tunngatillugu pingaaruteqarpoq kommunit periarfissat inuussutissarsiortut nunap immikkoortuani pigisaat aallavigalugit suliffeqalernissamut piareersaaniarluni suliniutinik nutaanik annertusaanermut suleqataallutik peqataanissaat taakkunatigut qulakkerneqassammat inuusuttut soqutigisaasa qaangiinnannginnissaat.

Qitiusumik ilitsersuisarfinnik sulilernissamullu piareersarfinnik pilersitsinikkut kommunalbestyrelsit suliassat suliarineqarnissaannut akisussaaffimminnik tunutsiinnassinnaajunnaassapput. Tassami Kommunalbestyrelsi nalunaaruteqartanermut nakkutilliinermullu periaasissanik suliaqarnissaminut pisussaavoq taakkunatigut qulakkerneqassammat kommunalbestyrelsip suliassat suliarineqarnerannik paasisimanninnissaa.

Suliffissaaleqinermik allaffissornikkut aqutsinerup ullumikkumut naleqqussarnerunissaa kissaatigineqarpoq, taamaalilluni suliffissaaleqisut atorfinitsinneqarnissaminnut piareersimallutillu piginnaaneqartut suliffimmik innersuunneqarnissamut ikiorneqarnissaat qulakkerneqassalluni. Suliffissaaleqisut piginnaassaat malillugit piginnaasaqarnerulernissamut suliniutit pilersinneqassapput, assersuutigalugu piginnaangorsaaqqiilluni suliniutit kiisalu piginnaasaqarnerulernissamut suliniutit immikkoortortakkuutaarlugit aaqqissuuneqarsimasut, taamaalilluni sulisinnaasunik pingaartumillu inunnik piginnaangortitsiviusumik ilinniagaqarsimannngitsunik suliffissaaleqisoqalernerani perifissaarutsitsisoqartaqqunagu.

Peqatigitillugu oqaatigineqassaaq pissutsit piginnaangorsaaqqinnissamut ikiorsiisarneq pillugu Inatsisartut peqqussutaat nr. 4, 31. maj 2001-imeersukku malittarisassaqaartitaasut suliffeqarnermi innersuussisarneq pillugu Inatsisartut peqqussutissaattut siunnersuummi tassani malittarisassaqaartitaasussat inngimmata.

Siunnersuutigineqarpoq kommunit inunnut ataasiakkaanut iliuusissatut pilersaarutit suliarissagaat suliffeqanngitsut suleqatigalugit. Inunnut ataasiakkaanut iliuusissatut pilersaarutit taamaattut suliarineqartassapput kommunit qitiusumik ilitsersuisarfinnik suliffeqalernissamullu piareersarfinnik pilersitsisimanersut apeqqutaatinnagu.

§ 5, imm. 5 malillugu pilersaarutigineqarpoq KIIP aamma KANUKOKA suleqatigalugit nalunaarummik suliaqartoqassasoq tassani ilanngunneqassallutik inuussutissarsiutinut ilinniartitaanermullu ilitsersuisarnermut piumasaqaatit pillugit aalajangersakkat.

§ 6-imut

Aalajangersagaq Inatsisartut peqqussutaanni atuuttumi § 11-mut naapertuuppoq. Aalajangersakkakkut qulakkeerneqassaaq sapinngisamik pitsaasumik suliffeqarnermi innersuussisoqartarnissaa.

§ 7-imut

Aalajangersagaq inatsisartut peqqussutaanni atuuttumi § 12-mut pingaarnerusutigut naapertuuppoq, taamaattoq siunnersuut malillugu taamatuttaaq pigisat nuunneqarnerannut aningaasartuutit akilerneqartarsinnaassapput.

Aalajangersagaq taanna malillugu pilersaarutigineqarpoq nalunaarutissaq suliarineqassasoq, tassani angallanneqarnermut pigisallu nuunneqarnerannut aningaasartuutitut tapiissuteqartoqartarneranut maleruagassanik aalajangersaasoqassalluni.

Aningaasaateqarfimmik aningaasanilluunniit immikkoortitanik pilersitsisoqarnissaa sulissutigineqarpoq aningaasartuutit qulaani taaneqartut aningaasalersorneqarnissaat qulakkeerniarlugu.

Siunissami Kalaallit Nunaat suliffeqarfittut ataatsitut isigineqalissaaq. Sulisartut nuttarsinnaassusiat annertusarneqartuassaaq taamaalilluni pissusiviusutigut sulisartut sulisussanik pisariaqartitsiviusuni suliffissarsiorsinnaalissallutik. Suliffissarsiorsinnaaneq isumaginninnermi ikiorsiissutinik isumalluuteqarnerminngaanniit pilerinarnerulersinneqassaaq.

Taamatuttaaq pisortanit ikiorsiissutit pillugit Inatsisartut peqqussutaat nr. 10, 1. november 1982-imeersumi § 17 innersuussutigineqarpoq taanna malillugu inuk nuunnissaminut akissaqanngitsoq ikiorserneqarsinnaavoq, tamanna pineqartup ilaqutaasaluunniit inissaqarniarnerannut inuutissarsiornerannullu iluaqutaassappat.

§ 8-mut

Aalajangersagaq inatsisartut peqqussutaanni atuuttumi § 13-imut naapertuuppoq, taamaallaalli oqaasertaanik iluarsiisoqarluni.

Aalajangersakkakut qulakkeerneqassaaq suliffeqarfimmut sulinermi aaqqiagiinnginnermut ilaasumut innersuussisoqartassanngitsoq. Aalajangersagaq taamaallaat atorpeqartassaaq inatsisit malillugit siumut ilimasaareqqaarluni sulinermik unitsitsinernut atatillugu. Taamaammat suliffeqarfimmut isumaqatigiissutit unioqqutillugit sulinermik unitsitsiviusimasumut innersuussisoqartarsinnaassaaq.

§ 9-mut

Aalajangersakkami inatsisartut peqqussutaanni atuuttumi §§ 14-16 ataatsimoortinneqarput oqaasertaanik allanngortitsisoqarluni.

Imm.2-mi aalajangersakkakut qulakkeerneqassaaq, kommunip sulilersitsineq iluatsinngitsoortillugu tamatumunnga pissutaasunik paasissutissanik tigusaqartarnissaa taamaalilluni kommunip naliliivigisinnaassammagu tamanna suliffeqarfimmut suliffissarsiortumulluunniit kinguneqartinneqassanersoq assersuutigalugu annertussusileriikkanik ikiorsiissutit akiliutigineqartarnerata unitsinneqarneratigut.

Imm. 3-mi aalajangersakkami sulisitsisoq iluatsinngitsumik innersuussigaluarnermut atatillugu aningaasartuutaasimasunik akiliisussanngortinneqarpoq.

§ 10-mut

Naalackersuisut suliffeqarneq pillugu nutaamik aqqiussusseqqinnermut atatillugu kiisalu Danmarkimi suliffissaaleqinermik allaffissornikkut aqutseriaaseq AIDA 2 suleqatigalugu suliffissaaleqinermik allaffissornikkut aqutseriaatsimut IT-mik tunngaveqartumut ilusiliussassaaq nutaaq suliaritissimavaat.

Siunissami suliffissaaleqisut ataasiakkaarlugit sullinneqartalernissaat periarfissaalissaaq, soorluttaaq suliffissaaleqinermik allaffissornikkut aqutseriaaseq aqutigalugu ilinniarfinnik, ilinniarnissamut periarfissanik, suliffissanik neqeroorutitik il.il. paasisaqartoqarsinnaalissasoq. Aammattaaq allaffissornikkut aqutseriaatsimi tassani suliffissaaleqinermik allaffissornikkut aqutsineq ingerlatissaallugu periarfissaqalissaaq. Suliffissanik nalunaarsuiffik pilersikkiartuarneqarpoq.

Suliffissanik nalunaarsuiffik pisortaqaqfinni oqartussaasut nalunaarsuiffii pillugit inatsisit atuuttut taamatuttaaq nalunaarsuiffeqarneq pillugu malittarisassat suliarineqartarnerat naapertorlugit pilersinneqassaaq. Suliffissanik nalunaarsuiffikkut kisitsisitigut paasissutissat tunngaviusut pissarsiarineqarsinnaalissapput. Naatsorsueqqissaartarfiup Kalaallit Nunaanni Naatsorsueqqissaartarfik pillugu Inatsisartut inatsisaat sunngavigalugu paasissutissat tamakku atortarsinnaassavai. Naalackersuisoqarfiup paasissutissat siunertanut nalunaarsuiffeqarneq pillugu

malittarisassani attuumassuteqartuni akuerisaasunut atortarsinnaassavai. Paasssutissat Suliamut, Namminersornerullutik Oqartussat qitiusumik allaffeqarfianni qarasaasialerinermit tunngaveqarluni kisitsisitigut paasissutissanik nalunaarsuiffiusumut, suliffeqarnermi naliliisarluni misissuinerit suliarineqartarneranut tunngavigineqartumut, tunniunneqartarsinnaapput. Suliaq suliffeqarnermik iluarsaaqqinnermut ilaavoq.

Kommunini allaffissornikkut nalunaaruteqartarnermi nammagassat killilerniarlugit suleriaatsit naleqqutut pillugit Naalackersuisut Naatsorsueqqissaartarfillu isumaqatigiissuteqarsinnaapput Naatsorsueqqissaartarfiup kommuninit paasissutissanut tunngavinnut isersinnaaneramik qulakkeerinnittumik.

Imm. 1 malillugu suliffissanik nalunaarfuiffiup pilersinneqarnissaa pillugu Naalackersuisut malittarisassanik aalajangersaasinnaanissaannut, taamatuttaaq suliffissanik nalunaarsuiffiup atornissaanut kommunalbestyrelsip pisussaaffii pillugit maleruagassanik, nalunaarutikkut piviusunngortitsisoqassasoq naatsorsuutigineqarpoq. Siunertaavoq kommunit suliffissanik nalunaarsuiffiup piviusunngortinneqarneranut, atorfinnik inuttaqanngitsunik nalunaarutiginnittarnermut assigisaannullu peqataanissaminnut pisussaaffilerneqassasut.

§ 11-mut

Aalajangersagaq suliffissarsiuussisarneq pillugu peqqussummi atuuttumi § 18-imut assinguvoq. Naalackersuisullu suliffissarsiuussisarfinni sulisut ilinniartitaasarnerannut akisussaaffeqarunnaarput. Naalackersuisut pisussaaffituarilerpaat sulisunik taakkuninnga ukiumoortumik pikkorissartitsisarnerit. Aalajangersakkakut qulakkeerneqassaaq suliffeqarnermi siunnersortit ukiumut ataasiarlutik suliniutinik nutaanik, aalajangersakkat atuuttut qanoq paasineqarnissaannik il.il. ilisimatinneqartalissasut taamatullu inatsisit allaffissornikkut aqunneqarnerata oqallisiginissaanut periarfissinneqartarlutik taamaaliornikkut ilaatigut nunatsinni assigiiartumik inatsisit atortinneqarnerat qulakkeerneqarsinnaammat.

Kommunalbestyrelsimut ilaasortanik qinigaarlaanik pikkorissartitsisarneq pillugu malittarisassakkut qulakkeerneqassaaq tamakkununnga tunngassuteqartuni inatsisinik ilisimasaqalernissaat taamaaliornikkullu qulakkeereqataaffigalugu inatsisit malinneqarnissaat.

Aalajangersagaq taanna malillugu pikkorissartitsinernut aningaasartuutit kommunit Nunap Karsiatalu agguattassavaat imaalillugu Nunap Karsiata ukununnga aningaasartuutit akilertassallugit: angalanerit, ineqarnerit kiisalu pikkorissartitsinermut aningaasartuutit nalinginnaasut taamatuttaaq ininut pikkorissartitsisinullu aningaasartuutit. Kommunip pikkorissartitsinermut akiliutit aamma kommuniniit pikkorissarnermut peqataasut ullormusiassaak akilertassavai.

§ 12-mut

Aalajangersagaq inatsisartut peqqussutaanni atuuttumi § 19-imut naapertuuppoq.

Maannakkuugallartoq aalajangersagaq taanna kiisalu kommunini suliffissaqartitsiniutinut tapiissutit pillugit Namminersornerullutik Oqartussat nalunaarutaat nr. 42, 28. september 1994-imeersoq aamma kommunini inuusuttut sulliviinut tapiissutit pillugit Namminersornerullutik Oqartussat nalunaarutaat nr. 37, 29. december 1995-imeersoq malillugit tapiissuteqartarnermut aningaasanut inatsimmi aningaasanik immikkoortitsisoqarsimavoq.

Naalackersuisut suliffeqarnermik siuarsaneq siunertaralugu nunaqarfinnut isorliunerusunullu tapiissuteqartarsinnaapput, tamakkunani suliffinnik nutaanik aallartitsiniartarnerup ajornartorsiutaanera nalinginnaammat.

Kommunit suliffissaqartitsinermik siursaaniarluni iliuitsit saniatigut suliffeqanngitsunik sulilersitsiniaaneq pillugu Inatsisartut peqqussutaat malillugu sulilersitsiniaanermut suliniutinik pilersitsinissaminnut periarfissaqarput. Sulilersitsiniaanernut taamaattunut aningaasartuutit kommunit aningaasartuutissaraat.

§ 13-mut

Misileraasinnaanermut aalajangersagaq 1999-mi inatsisinut ilanngunneqarpoq ataannassasoq kissaatigineqarluni. Misileraanernik pilersitsisinnaaginnarnissaq pissusissamisuussaag taamaalilluni suliffissaqarnissaq qulakkeerniarlugu periarfissat nutaat misileraanertut misilittarneqartassammata.

§ 14-mut

Aalajangersagaq taanna nutaajuvoq. Aalajangersakkakut qulakkeerneqassaaq suliffeqarnermut tunngatillugu suliniutit ingerlaavartumik allaaserineqartarnerat ineriartorteqqinneqarnerallu. Ukiumoortumik nalunaaruteqartarnej suliffeqarnermut tunngatillugu suliniutinik ineriartortitseqqinnermut Naalackersuisunut atugassaqqissuuvoq.

§ 16-mut

Peqqussutip atuutilersinneqarneratigut peqqussut atuuttoq atuukkunnaarsinneqassaaq. Inatsisartut peqqussutaat malillugu

Namminersornerullutik Oqartussat nalunaarutaat sapinngisamik piaartumik kingusinnerpaamillu ukioq 2004-imi iluarsaateqqinneqassasut naatsorsuutigineqarpoq.